

二  
知  
軒  
文  
存

二知軒文存卷三十二

定遠方潛頤子箴

贈光祿大夫張公墓誌銘

并序

公諱蔭穀字藍畦先世居江西自明時有諱驚者始遷廬州  
府合肥縣至公之曾祖從周卜居於西鄉周公山下殷家畝  
山介大潛紫蓬兩山之間綿亘嶽嶽人遂稱爲周公山張氏  
祖世科太學生父傑皆有名德公生而好學性嚴重不與羣  
兒嬉從其鄉人湯先生某讀書旦夕刻勵未及三月髮落幾  
盡道光己丑補博士弟子員三應秋試輒被黜於有司時公

之祖父母父母均在堂食指浩繁生計日蹙公乃罷制舉業  
晝侍重闈以謀菽水夜則取諸子曰聞所讀書爲之剖晰意  
旨教以作文之法至漏三下猶娓娓不倦癸巳公原配孫夫  
人卒越三年公之祖世科公卒又五年公之父傑公卒又四  
年公之母李太夫人卒又一年公繼配魯夫人卒又一年公  
之仲子婦吳氏卒又一年公之繼祖母章太夫人卒十七年  
中斬衰之喪三期之喪四而公之六子樹培又早夭其間延  
醫侍疾必躬必親遭罹鞠凶哀毀盡禮祭奠殯葬織悉周至  
重以男婚女嫁者摺拄經營心力交瘁鄉里皆服公之善於

持家也迨丙午壽州盜起掠公鄉公則聚鄉人部以兵法擊走之逆料東南將有兵患乃率諸子廣招豪傑材武之士相與周旋曉以忠孝大義人莫測其所爲已而粵賊陷金陵蔓延江淮近踞廬州捻匪又乘間而起公初聞警卽出資賑貧戶倡辦團練爲官軍聲援簡其精銳者命伯仲二子帥之從剿無巢英霍太潛諸邑所至克捷然官軍諸將帥往往擁兵自衛委鄉軍嘗賊無所接應以故不能竟其功公知禍猶未已不得不爲自全之計招鄉人築堡於周公山殷家畝從而歸者萬餘家而前直隸提督劉銘傳雲南布政使潘鼎新甘

肅涼州鎮總兵周盛波廣西右江鎮總兵周盛傳江蘇徐州鎮總兵董鳳高皆奉公條約相率築堡以耕以戰連摧粵賊陳玉成擒賊張落荆兩巨股數萬之衆斬馘無算七八年間公家雖破公鄉獨完威望義聲赫然爲一郡之冠於是賊相戒勿犯三山蓋左則大潛爲劉氏所居右則紫蓬爲周氏所居也時鳳臺苗沛霖假團練爲名樹黨自固大帥倚之洵擢監司淮北千餘里聞風相應公心知其非戒鄉人毋與往來而沛霖卒以叛誅惜乎公不及見之矣當其躬際時艱捍衛桑梓解紛排難轉危爲安於是三山之衆應募而出分爲樹

銘鼎盛四軍隸合肥相國部下規復三吳掃盪粵賊擒匪由  
東南而及西北大勛克奏爵賞酬庸而淮軍足與湘軍相抗  
實賴公爲之倡云性尤孝友公父足患疔日以口吮之竟瘥  
族人戚郤之孤寡有廢疾者必賙卹之貧不克葬者爲卜地  
以葬咸豐六年歲大旱人相食公無儋石儲每屏當得升斗  
粟輒分半以給鄉里廬郡再陷於賊難民來投公堡者必使  
得所無流離之苦與人交必誠必信遇不平事則義形於色  
家非素豐居恒節儉愛惜物力然當大難則揮金如土不少  
吝惜焉公以嘉慶癸亥九月初三日生卒於咸豐庚申九月

二失車三不  
卷三十一  
十三日享年五十有八卒之日弔者不遠百里而來咸欷歔  
泣下曰公常活我也以伯子樹聲貴三代皆贈光祿大夫妣  
皆一品夫人公之三繼配爲李夫人公子九人樹聲廩膳生  
今官江蘇巡撫樹珊

記名提督廣西右江鎮總兵死德安之難贈太子少保諡勇  
烈爾蓋鹽運使銜山東補用道樹棠五品銜候選中書樹屏  
記名提督樹玉四品銜候選員外樹培其二殤孫十人某某  
孫夫人初葬於周公山北靳十六衛莊之原公匱於某年某  
月某日啟封合祔同治甲戌中丞公丁李夫人憂奉喪歸合

肥營窀穸畢僑居寶應以事至揚州持贈公狀屬濬頤補作墓誌迺爲銘曰

公之弭亂在一鄉屹然壁壘俾金湯沒後二年軍甫成叶厥初起義民勿忘公之教子罕與倫文通武達社稷臣中丞述哀得其真碩德懿行追古人十有五年匪遑緩肥水肥山白雲斷孝思翬翬躬則蹇春露秋霜雙淚泣昔也荷戈今列戟佳城峩峩郭西宅蕃衍熾昌被遺澤傳之千秋視此石

提督銜 記名總兵葉君雲巖墓誌銘

并序

往在京師得交一內行敦篤樂善好施之君子曰葉雲巖子



與君初不相識以永定門外馬回甸義冢地隘欲擴充之人  
有以君告者因過訪君君時爲江南提塘官見善必爲孳孳  
不倦名動輦下公卿交游徧海內與予把臂欣然商以購地  
之事君遂廣爲勸募佐予集資若干適予有嶺南之役交某  
君經理其事而君亦從軍於外久不通問迨同治己巳予量  
移兩淮過金陵乃復見君君奉曾文正公檄移建江甯府學  
於朝天宮命君董其事時將落成與君一晤而別癸酉之冬  
君調署奇兵營游擊駐儀徵予竟弗獲相見而甲戌之冬則  
遽聞君沒予服君之宅心醞粹勇而兼仁天必大有以報之

顧乃未竟其施爲可悲也越明年其鄉人某持君之狀來乞  
銘於予予弗敢辭按狀君姓葉氏諱圻號雲巖浙江秀水人  
曾祖青萊祖宗泰父濤三代贈如君官君以嘉慶十二年十  
二月初一日生幼而穎敏讀書深明大義六韜三畧貫串於  
胸中挽強命中材力過人年十九卽舉於鄉五上公車輒報  
罷道光乙未充江南提塘癸卯差滿以營守備用叙勞勩加  
都司銜時直東南軍事起胡文忠公知君之才調赴軍營差  
遣旋又隨曾文正公進剿江西肅清全省於皖解青陽城圍  
於浙江攻湖州奮不顧身所在戰功卓著君尤長於製造在

皖則火藥等五局在江甯則工程局軍械所遇事講求俾成利器以佐戎行火藥鉛丸發無不中大帥咸倚重之由都司洵擢至

記名總兵加提督銜並

賞給一品封典同治八年權提右營參將事統帶師船兼陸路巡防時有裁汰兵五百名皆老羸及陣亡所遺幼弱覓食無所者君爲之惻然與當道各捐廉俸並撥公帑集成鉅欸取息於質庫月給口糧以資其生兼爲清節堂籌卹瘞費寒冬則散給貧民衣禪如是者五稔滬上民戴其德去滬之日

白叟黃童遮道焚香環送於百里之外云儀徵居水陸之衝  
福德洲新浚鹽河移棧於此萬艘雲集五方雜處羣不逞之  
徒時虞竊發固以保甲爲重君至則偕同有司周歷巡察商  
旅又安乃於十三年十二月二十日卒於官享年六十有八  
君卒之日閭閻嗟悼弔者塞途君配楊夫人子汝鏞兩淮候  
補鹽大使君性至孝少時失怙哀痛如成人戚鄰咸異之迎  
養母氏陸太夫人於京邸母素多病君朝夕扶持抑搔衣不  
解帶夜不安枕病瘥乃已三十年如一日孺慕之忱至老弗  
衰以母病祈福施藥餌凡京師之悅生堂恤養所皆賴君贊

襄其事實惠及人君雖沈沈武夫而恂恂儼儒者喜交游重  
然諾友朋緩急所求無弗應者鄉里之人卒於京師貧不能  
歛君仗助之且歸其喪蓋無歲無之顧自甘澹泊躬矢儉勤  
身後囊橐蕭然不留一錢嗚呼品詣爲獨絕已將於某年某  
月某日葬於某原銘曰

君之德我所欽君之喪我未臨歎然有媿於心我則知君之  
深異夫諛墓者之失其真君誠今之古人白頭揮淚手勒珉  
唐忠壯公墓誌銘

并序

公姓唐氏諱殿魁字蓋臣合肥人曾祖璧祖大經父夙儉世

有隱德公以道光十二年二月二十八日生賦性剛直好任俠年少時卽有請纓之志咸豐三年粵寇陷金陵皖北盜賊乘間而起鳳臺苗沛霖假團練名擁眾數十萬橫行劫掠所至爲墟官不能制公隨同劉軍門銘傳集鄉人申明大義以兵法部勒子弟賊來輒擊走之有司因倚之以辦團練南禦粵寇北捍苗匪十年赴援六安力解其圍拔補千總十一年攻克合肥之三河汛同治元年始應募隸銘字營劉軍門統之規復江蘇駐軍滬上五月迭攻南匯川沙金山衛奉賢柘林等廳縣躬冒矢石戰功尤多大帥入告擢守備

賞藍翎是年六月令直隸總督合肥相國時爲江蘇巡撫命  
公回皖添募銘字右營九月成軍連下南匯川沙金山衛奉  
賢柘林青浦各城並擊退虹橋大股之賊

朝廷獎其勞擢都司

賞換花翎二年正月賊圍攻常熟昭文層層築壘並分踞楊  
舍福山各汛江陰無錫金匱三城公會同諸營航海下福山  
以解常昭之圍進薄楊舍賊列陣相抗以逸待勞公身先士  
卒大軍繼之鋒不可當賊盡卻公乘勝窮追城上飛礮如雨  
骸中鉛丸深入肌理亟剷去之裹創復戰遂拔之旋復會攻

江陰無錫金匱次第克復疊擒渠魁

賜振勇巴圖魯名號擢游擊又血戰下江陰擢參將

晉副將銜

記名總兵是年十一月劉軍門圍攻常州踞奔牛鎮賊酋邵之倫乞降許之東南北三面合圍唯西通丹陽一路地險賊眾咽喉之地賊所必爭邵之倫雖以地獻必得我軍助守其心始固乃令公與副將黃桂蘭各率所部往公甫至而常州丹陽之賊果分道來犯公戰退之自顧兵單瀕河而營賊初不察虛實及夕偵之止二營乃率眾環攻公告桂蘭曰奔牛



爲常州門戶我軍舍此而去之倫必不能守則常州一軍危矣計唯有死守待援桂蘭以爲然相與揮淚誓師衆皆感奮賊屢攻屢敗死者數百人度陸攻不下勾結甯波姦民僞爲夷人狀駕礮舟轟擊岸上賊乘勢進薄礮震營壘屋宇顛覆所部五百人傷亡過半相持二十餘日糧盡勢幾殆而劉軍門攻常州亦中礮傷額聞奔牛警裹創赴援苦戰數日公氣益振夜則遣死士潛運糗糧軍火詰旦飽食嚴裝與援師夾擊大破之追逐十餘里殲賊酋僞官天將朝將並悍卒無算是役也公以一旅之師拒水陸賊十餘萬忍饑衷甲志不少

挫卒能會合援師保全要隘常州迎刃而下一戰之力也晉  
提督銜又以攻克常州手殲巨憝以提督記名簡放三年四  
月遂統銘字右軍六營四年四月隨劉軍門渡淮爲游擊之  
師日行百數十里公必前驅不以爲苦且戒其麾下將弁曰  
我輩布衣受

國恩身膺將領一營之費月糜帑三千若稍耽安逸不思殺  
賊報國何以爲人效命疆場吾儕分內事死且不懼敢云勞  
耶聞者咸爲心動公平時撫循士卒若子弟然號令嚴肅有  
犯必懲所到之地體恤民艱不令妄取一草一木民尤感之

五年正月攻克湖北黃陂補浙江衢州鎮總兵旋奉

上諭記名提督唐殿魁著遇有提督缺出儘先簡放並賞給  
正一品封典遷廣西右江鎮總兵仍留營督師剿賊自是風  
沙雨雪無日不奔馳於鄂豫間迨六年正月十五日抵湖北  
天門之尹隆河賊反戈相向公鏖戰良久賊狂奔急躡之賊  
又列陣以待部將總兵田履安陷陣死公憤甚策馬直前手  
刃數十賊賊懼而竄公不肯少休欲盡殲賊揮兵再進而河  
崖高丈餘所乘馬中飛礮墜河力竭遇害年甫三十有六事

聞議卹

贈太子少保銜

予謚忠壯國史立傳江蘇湖北及安徽本籍均建立專祠  
賞騎都尉兼一雲騎尉世職公兄弟五人齒居四配宋夫人  
子治堯今福建陸路提督俊侯軍門爲公之弟與子交莫逆  
持公之狀來告曰吾兄沒於王事忽忽已九年矣將以某年  
某月某日葬某乞吾子爲文以彰其節傳示子孫感且不朽  
予弗獲辭爲之銘曰

以少勝多以守爲戰如公之勇足當一面功在三吳名達  
九重盡瘁而已不尸其功兵貴神速有進無退忠哉壯哉甘

蹈危地公之靈爽助季平番險逾鹿耳威揚虎門戡戡佳城  
以寔以窆傳之千秋視此貞石

通議大夫按察使銜寧紹台道史公墓誌銘

并序

公姓史氏諱致諤字士良一字子愚號耜梁爲漢溧陽侯崇  
公五十六世裔孫世居溧陽之湖埭里宋末徙夏莊公之五  
世祖隨進士江西瑞州府知府有循吏稱高祖貽儉爲文靖  
公之兄舉人湖北安陸府知府曾祖勝妣氏管以兄范之子  
汝櫛爲嗣是爲公之祖妣氏蕭又以兄汝楫之子錫祺爲嗣  
是爲公之考妣氏楊三代以公貴

覃恩累贈通奉大夫妣皆贈夫人其本生兩代皆得

貤贈如例先是公本生祖靜香公以就姻遷居常州公考蕉鄰公早歲失恃事繼妣謝太夫人以孝聞補弟子員贅於楊氏生子三伯致諒叔致穎公次居仲以嘉慶七年十一月十六日生幼敏悟靜香公鍾愛之雖育於外家常攜之室中令侍飲食靜香公棄養蕉鄰公由青州奔喪歸哀毀咯血公方八齡旦夕侍抑搔有若成人比長慷慨尙義善處繁劇事戚族尊行以疑難相託者紛如亂絲立剖之年十四五卽有幹材同里憚紉之張雨棠兩先生負文學盛名公從之遊得所

師法蕉鄰公屢試不第久客袁浦體羸多病公年十八左右  
扶持頓忘其苦道光四年寄籍宛平舉茂才是年蔣淑人來  
歸公恒館於京師十四年舉順天鄉試十六年成進士改翰  
林院庶吉士故事庶常於秋間大課公課畢方欲歸省而蕉  
鄰公訃至一慟幾絕星奔返里經營喪葬盡禮盡哀先是蔣  
淑人卒於家遺子恩綬甫九齡公服闋復娶於蔣卽淑人之  
同胞女弟二十年散館授編修歷充國史館纂修二十五年  
充庶常館提調奏辦院事公在館久爲掌院所倚重又從事  
清秘堂六七年無一日曠誤遇有鉅製盛典及館中奏疏掌

院一以相昇淹雅明達克稱厥職二十六年充順天鄉試同考官得士二十三人迎養楊太夫人於京邸二十七年京察一等二十八年覆帶引

見

記名以道府用旋擢江西廣信府知府

宣廟召對

天語褒嘉以爲詞臣罕有其匹廣信控豫章上游爲閩越孔道號稱難治而漕務更多弊公下車之始政尙嚴明百廢具舉治獄詳慎多所平反捕貴溪漕棍劉開發等十人寘之法



頌聲翕然二十九年部議開廣信之廣豐及袁州之宜春兩縣礦公以乾隆九年廣豐開採僅得銀三萬兩而捕剿礦匪則糜費二十餘萬得不償失徒以擾民檄屬吏至廣豐試所產似銀非銀名曰垢石白諸上官其事遂罷直東南大水廣信山鄉尤患衝決則講求水利修堤放閘督率所屬次第行之故鄰郡告災而所治獨豐稔勸捐助賑立集巨款贖至省垣而外郡饑民來者日眾調卹流亡全活無算清查州縣賦額庫帑有無虧絀綜覈鉤稽條分縷析下僚罔敢欺隱而調劑盈虛亦無有以此獲咎者試院年久傾圯捐廉俸修葺之

校場向濱河爲山水所齧移之白茅洲並建關帝廟南門外  
長清浮橋朽腐博采羣議改用渡船聯之爲船移於鍾靈橋  
故址又於通衢造五甕石橋行人便之公餘課士於信江書  
院論文講藝士風丕變咸豐元年權南昌首郡大府知公才  
壹意委任公不阿不亢凡有關於民生利病者反覆力爭必  
得請而後已是年冬回廣信任二年粵寇犯長沙江楚連界  
民情震動公復權首郡總司團練並辦保甲親歷巡邏風雨  
晦冥不少休於德勝門外築三礮臺修補城垣二千五百餘  
丈改建章江門濬濠城內豫章溝設懸門布渠答一切守禦

軍械甫備而九江戒嚴南昌城門晝閉譎言四起公請於大府洞開七門而派員嚴稽出入不使姦宄溷迹人心始定厥後粵寇由金陵回竄九江陷南康掠吳城圍攻省垣九十餘日江忠烈公督師赴援實賴公先事預防部署周密用能嬰城固守轉危爲安十月公仍回本任三年寇陷饒州延及撫州廣信界撫饒以貴溪爲要隘公招募健卒名信新軍馳至鷹潭相度形勢因險設伏與浙軍相犄角賊知有備不敢前所屬七邑胥安而撫饒之東南境亦恃爲屏蔽當是時省垣被圍久內外隔絕惟貴溪之東有間道可達進賢公復遣員

弁輦城守所需者以資省垣俾無缺乏初浙省協解黔餉十萬以道梗折回廣信公白諸浙撫請截留以備江右緩急至是浙餉亦絀公會七邑紳董曉以輔車之勢民間輸納以償浙逋十日而集八月復權首郡四年得荷真除之

命賊氛甫退百務坌集公則協和將吏激厲軍民上下一心艱難共濟江右諸郡行淮鹽者過半惟廣鄰浙行浙鹽軍興淮鹽不至公創議借辦浙引以餘息充餉名曰餉鹽大府疏入

報可卽命公襄其事年餘銷引逾於常額江楚及浙皆利之

省垣半毀於城樓櫓睥睨多不完公請修復增月城四礮臺  
六汰新募之章武軍併入舊部信新軍以節糜費倡捐水龍  
會置救火兵百二十名居民至今賴之方省垣之解圍也賊  
由九江上犯楚之通城興國仍與南昌屬之武甯義甯相逼  
賊自興國攻義甯未下遂陷武甯武甯在萬山中實爲南昌  
肘腋之害公自率信新軍偕浙軍游擊常海馳往剿賊迭挫  
之於紫鹿嶺於巾口於火鑪坪於箬田甫一月下之會下游  
有警折回省垣是冬我吳城師失利楚軍亦敗於九江之官  
牌夾南昌大駭援師四集與江右諸軍不相下主客判然重

以餉乏外患未已內讟復可憂督師曾文正公與公爲齊年  
友素稔公引以爲重故楚軍亦皆敬公諸軍或有忿爭公至  
力解則有勇丁二持刀索質庫錢勢洶洶公見而立斬之一  
軍皆驚大帥弗以爲忤五年兼攝鹽法道文正檄辦楚軍子  
彈火藥礮位三局事並籌餉精亡何饒廣相繼陷義甯亦陷  
公憤甚請率偏師爲大軍前驅大府不許公益殫心竭力以  
助諸軍之出而逆酋石達開由楚入江疊陷六郡公益鎮靜  
練軍繕守賊終不敢窺南昌而去六年丁楊太夫人憂公聞  
訃哀毀奔喪於杭州文正擬請奪情公力持不可旣行巡撫

二矢車方有  
卷三十一  
文俊公仍奏請留江襄辦軍務而西安將軍福興公駐軍廣  
信復奏調隨營七年奉

旨交福興軍營差遣委用將軍以乏餉欲就廣信勸捐公念  
弋陽貴溪楚軍所在因地爲糧民力已竭上饒玉山廣豐興  
安鉛山五邑雖殷富以寇警遠避均無可捐唯鉛山之河口  
鎮商賈輻輳親往勸諭兩月得銀十餘萬旣濟福軍更以其  
半充藩庫嗣巡撫耆齡公以改辦浙鹽具有成效偕侍郎黃  
公贊湯檄公辦理西岸鹽務仍筦三局八年福將軍復檄赴  
江浙乞餉抵常山值石逆大股竄廣豐衢防告警公偕金衢

嚴道繆武烈公上書當道請以河口一軍兼程繞道會浙師以解廣豐之圍復謂廣信爲浙江外蔽衢州爲廣信後勁必緩急相濟賊庶不得逞迫全浙淪陷衢州幸存今陝甘總督湘陰相國奉命視師乃藉此爲進兵地人始知公所議得兵機之要也公旣至浙福將軍旋解兵柄公念外除十載父母殯宮猶未合祔遂歸常州卜地於南門外龍游河將誡吉舉山林大事而當道飛檄召公還不得已留其弟營窰窰俶裝就道九年服闋到省公前任南昌所屬失守例有處分以功過相抵免議又以大計保薦卓異勞績



賞加道銜嗣復奉

旨免補知府本班以道員用並不論雙單月儘先選用十年入都引

見奏對稱

旨奉

上諭發往浙江交王有齡差遣委用又

命幫辦浙江團練蘇常不守南北道阻改由豫楚行十年抵常山浙撫王忠愍公檄赴江右催餉因而折回鮑軍門超方廓清江右公上當道書以浙事日亟請出偏師下擊巖州以

徽軍爲策應閩中勁旅會衢防直搗蘭谿以廣信防兵爲策  
應則賊勢中斷圖反救杭越之圍可解惜不果行寇陷全浙  
二年浙撫湘陰相國檄辦滬上商捐奏署甯紹台道時則會  
文正公兼轄浙江軍務江蘇巡撫合肥相國節制甯紹兵事  
兩相國皆重公聽便宜行事甯紹台自上年陷後天台民團  
首先恢復而甯波亦資洋兵之力下各城方謀畫曹江而守  
尋以法國總兵馬籌思與游擊布興有李光所部廣勇互鬪  
廣勇潰賊乘間回竄慈谿奉化將撲郡城公聞之立請東渡  
甫受篆卽報慈谿失守距郡才四十餘里烽火相望兵單餉

匱公激厲居民登陴助守整飭稅釐以通餉源公之附輪船來甯也與美國兵官華爾同舟見其忠勇奮發遂介以見英國總兵哇樂德克法國稅務司日意格推誠相語均感服約東洋兵頓釋前隙公以賊犯慈谿覩我有內難今出不意攻之城可復乃令布興有率礮船先迎堵於大西壩檄華爾攻慈谿撥稅務司姚防洋兵及同知謝采嶂團勇應之慈谿賊分竄鄞界另股擾及半浦而嵎縣新昌之賊復大舉犯陳公嶺我軍旋克慈谿華爾中銃卒而陳公嶺不守奉化復陷知縣屈永清死之南北渡防務又警公念三面皆賊必以剿爲

防爰乞餉於滬令都司楊應龍募忠勇軍紳士李鏐招集大  
嵐山義勇及各鄉練勇又以廣勇潰散慮爲賊用招之回令  
布與有布良帶守備張其光分統之部署方畢而賊由北渡  
間道越櫟社直犯郡城天正雨陰霾蔽空人心惶惑公勒兵  
以待伺其懈輒出擊之賊陰有退志則分兵兜剿連敗之橫  
溪石橋進薄奉化楊應龍率死士百人由城西北布竹梯以  
登奪其北門賊驚潰下之奉

旨補授甯紹台道奉化敗賊復勾結上虞賊分道犯慈谿餘  
姚公以賊眾我寡分援力弱不如併力搗上虞則賊且急而

遷救顧出師漸遠不能兼顧郡城且籌餉維艱日不暇給乃以兵事屬之前署道張公景渠而張公已奉

旨逮問公一再籲大府奏留以堅其銳往之志用能士飽馬騰中外協力所向有功復上虞下嵎縣新昌我軍至是已增萬餘人乘屢勝之勢謀規紹興賊首僞來王戴王擁衆七萬與我師夾曹江而軍我師奮勇渡江敗賊於東關又敗之於夏家埠直抵紹興會洋將勒伯勒東達爾地福輕進礮炸而卒諸軍稍却蕭山諸暨之賊來援我軍再戰悉擒斬之二年再薄紹興分攻三門賊跋前疐後遂不得專力以踞金華而

浙東之事易爲矣大軍旣克金華諸暨賊酋方蒂桂降於我軍遂復紹興進克蕭山與大軍會於錢江浙東以平公力籌未發之餉撤遣之費十餘萬而大軍之圍杭者復需月解兵米二萬石其他餉項亦多取給於茲竭力圖維事無不濟洋將陰狡嗜利馭之之術則在自強我先鎮撫其軍自爲戰守使彼無所挾反足收效彼以火器猛烈弗知持重公則陰遣一軍左右雜藥之攻紹之役雖洋將不利而全局無損職此之故公於外國駐甯各酋皆待以誠信日意格尤敬公用是交涉事件咸得其要領會同英領事捕斬與英人私設護商

局之鎮海土匪吳浩泉甬江爲通海口岸內地梗阻懋遷者  
皆登海舶甯郡初復內洋盜匪剽掠爲患公乃添雇輪船礮  
艇往來巡緝先後擊沈盜艘七十餘更立安瀾局以綏靖之  
於是商旅無恐百貨屬至關征日有起色浙中吏治尙文飾  
初設釐捐漫無條貫公遴選局員務取廉潔者設旬月報嚴  
核之各州縣失事人員有能隨營効力者每捷必爲陳於上  
官曰此某之功八邑底定保全無算事平周歷所屬察被難  
輕重爲善後計賑卹瘡痍無微不至湘陰相國整飭吏治凡  
錢糧平餘及官府陋規俱議禁革公履任之初卽杜絕苞苴

至是躬率各屬實力奉行其有不便者皆於參牙時而陳其弊江南奏減蘇松太漕賦部議酌減三分之一并減常鎮十分之一杭嘉湖與蘇松錯壤賦額亦同奉

諭一律核辦公上書湘陰相國及文正公合肥相國指陳漕弊數千百言畧謂蠲賦惠政減正額尤宜革浮收於

國家儲胥無損於小民更爲獲益唯各州縣情形互異辦法不同當擇大者奏咨立案餘並著爲省例以盡通變之宜大府建之三年湖州旣復賊由江西竄福建提督高勇烈公率兵會剿公艤舟濟之爲籌欠餉行糧軍火爲數至巨湘陰相



國以籌餉勞勩入告

賞加按察使銜並賞戴花翎臨海匪徒金得利以捕急竄南  
田南田故海島禁山土地饒沃金得利糾邱才清等據之築  
壘自固公白巡撫馬端敏公往剿平之毀石壘或議設兵屯  
田公上五難六弊之說議遂寢五年例造金州頭十兩號戰  
船故事牙戶領帖承辦勒索山民而官不過問公則捐廉給  
工價別令親信監造牙戶不得售其姦先是甲子春公以衰  
老乞休大府賴公籌餉不允所請嗣奉

中旨察看湘陰相國調任陝甘總督瀕行疏稱公辦理諸務

均無貽誤而年力就衰奉

旨以原品休致公乃得賦遂初公在甯時卽先營建宗祠蘇常克復遣人返溧陽修墓族姓貧者飲之宗親故舊自離亂以來依公者甚多歸田之後倍加撫卹無使失所常州溧陽初設善後局公捐巨欸爲之倡舉邦人之廉幹者司其事武陽兩邑分縣不分學遇選拔僅貢一人公偕紳耆白諸當道聞於

朝武陽添設貢額自同治癸酉科始公起家寒素習知民間疾苦又博覽史冊明於歷代治亂得失嘗謂橫雲山人明史

稿近而有徵

憲廟硃批諭旨九

昭代科律居恒研究故在官有所施設切中事情久而無弊  
軍興以來蒿目時艱一以培養元氣爲主前後籌餉累數百  
萬皆體味文正病商病農之語熟察而行若有所甚不得已  
者江右告警凡異言異服者卽以姦民論公省釋無辜至一  
千六百餘人附郭民廬癸卯賊至先檄焚之賊去予遺之氓  
茅茨以居辛酉訛言有警當事又欲焚之公時爲寓公走謁  
大府乞少緩以待民遠避後賊竟不至所全者數千家察吏

之材者畀以事推心置腹或不獲於上遭譴訶公身任之浙  
省失事諸員相戒勿用喻以棄婦委非公則曰使功不如使  
過也性機警乙丑署黃巖鎮總兵剛安泰公巡洋被戕報至  
將度歲急檄武弁追盜於爵溪洋聚殲之師旋已元旦矣與  
人一面卽識其爵里名字久而不忘翰詹考試故事由清秘  
堂散卷供事唱名公在清秘以館閣前輩清班峻望而唱名  
於供事非宜因躬自散卷字而不名百餘人無一誤者濬頤  
固親見之公論爲政之要須從根本做起方能腳踏實地顛  
撲不破與宋雪帆侍郎爲道義交函札往還無虛月嘗致書

侍郎謂五十年中不作欺人語不爲負心事而侍郎亦謂公學問經濟具此兩言誠定論也官江右時迎養楊太夫人承歡備至軍事一不以聞顧念蕉鄰公未逮祿養時復飲泣尤篤友愛少時與伯兄奔走四方以謀甘旨及官翰林伯兄倦游家居京秩清貧必井食易衣節俸金以爲接濟伯兄沒諸子幼稚公教養昏宦俾各成立季弟幼從公讀所至必偕猶子三撫育教誨皆有聲庠序歸族父之喪於江右養族之孀母無依者其他善事不可枚舉公貌清癯雙眸炯然終日正襟危坐不喜作行草書所服御至數十年雖敝猶整潔晚歲

里居率家人日出而作織屑必親伉爽無城府遇事欵悃始  
終如一不欲以矯激爲高而砥厲廉隅義弗苟取倭文端公  
爲公書慎節齋額跋之曰慎言語其立誠之學乎節飲食其  
無欲之學乎公之生平蓋得力於是云教二子讀書以治經  
爲急勉之爲眞讀書人又曰能讀書尤貴能識時務當今之  
世保家立業第一義在通經達禮有器識有擔當窮其本原  
不外乎人情物理上認真體驗隨時隨處勿輕放過則心思  
愈用愈靈事理愈着愈透澈嗚呼處事之道盡之矣好獎掖  
後進一技之長稱不絕口遇非禮直言規勸受人之惠報德

不厭所施於人事過輒忘故遠近聞公之喪而哭失聲者不知凡幾也公以同治十一年三月二十三日卒享年七十有一公元配蔣氏 贈淑人先卒繼配蔣氏

誥封淑人子二長恩綬元配出福建題補廈門同知署雲霄同知次恩緒繼配出舉人內閣中書孫四定官盤官奎官聯官孫女二光緒丙子恩緒計借北上道揚州持公狀乞爲埋幽之文將以某年某月某日葬某潛頤曩官京師爲詞館後進久從公遊知公最深不敢以不文辭迺爲之銘曰

我與公交因宋侍郎辱公愛我垂老弗忘銜恤遠遊道出信

江旣分清俸俾得成行嶺南北歸又荷公貺淹滯章門形神  
悽愴公曰勿爾爲之屏當過返故鄉甫營喪葬悠悠一別條  
逾二紀感公高誼古之君子及公歸來我官邗水毘陵匪遙  
近在尺咫過公之里末由見公城闔夜鑰有刺難通公喪未  
哭悒悒於胸讀公之狀警歎如逢侍郎曰公一時無兩壬癸  
之間治兵籌餼不尸其名功任人攘可謂知言盛德同仰吁  
公有子述公勲烈能讀父書使我心折我文非諛質而且實  
傳之千秋不可磨滅

太子少保東河總督喬公墓誌銘



濬頤曩在京師因李子皆太守得交於公時公官工部政最簡春秋佳日輒就子皆與子爲文字飲坦夷和易脫畧形骸並識濬泉溥泉兩丈而亡弟子健來應京兆試亦獲交於公及公典郡擢監司游躋開府三十年中望尊位顯獨於春明故舊念念弗忘遠道馳書歲時不絕手自作牋情詞肫懇子健殉丹陽之難荷公疏聞於朝俾邀

賜卹尤感大德迫濬頤量移兩淮適公養病海陵拏舟過訪驩然道故自是通問更密公再出山相去太遠尺一往還仍如疇曩乃光緒初元遽聞惡耗中懷悲悼不能自己公之扶

危定傾布澤行惠大江南北萬口同聲稱道勿衰公與溶頤  
同庚表揚勲烈傳示來茲固後死者之責也謹詮次公一生  
事蹟爲文以埋諸幽公姓喬氏諱松年字健侯號鶴儕山西  
徐溝人曾祖玠妣氏趙祖人傑湖北按察使有捕盜救荒治  
河諸大政書傳於世乾隆五十八年英國入貢道天津廉訪  
公時爲觀察宣布

朝廷威德饋遺悉却之英人敬公馴服盡禮而去嘉慶中英  
人猶有慕名求見者而廉訪公則已歸道山矣祖妣氏朱父  
邦憲刑科給事中妣氏馬本生父邦哲爲給諫公之弟直隸

遵化州知州政績載入志乘本生妣氏蘇繼妣氏李三代及  
本生皆以公貴贈榮祿大夫振威將軍妣皆一品夫人公以  
嘉慶二十年六月十九日生幼穎悟資秉過人道光甲午乙  
未聯捷成進士年甫十九以主事籤分工部補鉛子庫主事  
陞都水司員外歷充提調監督咸稱厥職咸豐元年典試湖  
南得人爲盛遷屯田司郎中截取知府揀發江蘇先權常州  
未幾調署蘇州時粵寇張甚吳中防堵之潮勇潛通上海賊  
酋劉麗川圖不軌公偵知之白上官誅其爲首者而人心以  
定會上海七營兵潰沿途劫掠金閶戒嚴城晝閉公滅騶從

由水關出撫循其眾安堵如故尋補松江府知府兼攝蘇松  
太道佐巡撫吉爾杭阿公治軍出奇制勝克復上海改署常  
鎮通海道旋即真除丁父憂吉公方駐軍九華山規復鎮江  
奏請奪情檄辦營務公之初至常州也倡捐廉俸召募義勇  
按戶抽丁設保衛總局嚴詰姦宄屢有所獲如守蘇時迨九  
華爲賊所陷吉公以身殉潰兵之患甚於上海金壇丹陽悉  
爲蹂躪常之西北鄉已有賊蹤十室九空其勢岌岌公則亟  
白當道撥餉十萬赴新豐鎮招逃亡歸伍散給口糧堅請總  
督怡良公移師丹陽以固門戶又於村墟到處巡邏果有土

匪受賊指者立擒爲首之姜方槐等十八人寘之法餘勿問  
是年復大旱則請免米船抽釐與商販護票諂勸富者輸將  
凡賑濟六次全活甚衆鎮江旣復公仍兼理營務處請設官  
銀局行鈔票法民皆稱便書院課士躬自檢閱優者獎之金  
陵久爲賊踞士之北上應京兆試者公仗以資斧午酉兩科  
登賢書者不少實公之賜嗣兼權兩淮鹽運使行假道法淮  
鹽由東壩運銷輸課尋丁降服憂大府倚公再請奪情由是  
朝廷知公才擢公運使當是時兩淮引地不通商販四散司  
庫如洗公移駐泰州設法招徠商販每年得課數十萬以濟

餉糈擢江甯布政司筦江北糧臺轉輸不匱威愛兼施消薛成良之患於未萌揚之人沆今猶能道之先是庚申江南軍營大潰南臺闐然長江水師枵腹而譁幾欲北犯公與各將領約片帆勿渡暫由北臺協濟並令沿江民團聯絡聲勢以助水師江北因之無恐公在蘇常七年襄贊戎機先事預防用能轉危爲安不失寸土迨移節廣陵總師于者左右無人遂至一敗而不可收拾矣常州旣陷居民避難紛紛渡江土人方指爲賊利其輜重戕其性命公聞而哀之於泰靖各港口設巡船防竄賊渡難民并於泰州設收養難民局病者施

藥沒者施棺行者予貲居者予食事平之日資送回籍故常  
之人僉曰公父我母我也同治二年陞安徽巡撫苗逆初平  
捻匪尙橫任柱張總愚等竄突楚豫倚蒙毫爲老巢每直各  
路兜圍輒圖回拒公由臨淮進扼壽州外搜巨寇內靖土匪  
三年冬粵寇藍大順合任張捻衆十餘萬回窺霍山公檄諸  
軍隨僧忠王大兵蹙之於英霍之交斬大順降其渠魁解散  
黨羽幾十萬江南之賊不復與北捻通而捻鋒亦始大挫乃  
逆黨姚紹采徐廣山輩陽爲投誠陰謀乘便公不動身色捕  
而殲旃又以雉河集爲捻之老巢議於其地建渦陽縣並建

龍山營於宿之龍山集下蔡爲苗逆老巢議移鳳臺縣治於其地又以皖北幅員遼濶廬鳳潁道治不及議分設安廬道於省垣奏入皆

報可六安霍邱之王稀毛猴王庭用爲著名巨憝楚軍屢剿未獲我師傷亡實多公又盡擒斬之於是商賈漸集釐稅日充軍餉以裕公旣除道梗復慮田荒乃買耕牛市穀種分給鄉農俾資生聚其流民來歸者資遣之與駐泰州日無異四年淮水漲溢壽州城不沒者三板百姓露處高阜瞿瞿待斃公廣備糗糧汎舟以賑十餘萬衆得慶再生軍書旁午文教



不興修復書院以逆產充公爲久遠計又與治常州日無異  
皖省稅則本輕顧以規費日增上下所需咸取給於此故浮  
收之數有數倍於正額者且有私收折價至十數倍者公重  
加釐定奏明通省暫征折色除部定解部定價外酌留羨餘  
以濟公用而上下衙門一切陋規盡數刪除民受其福公亦  
不至重累十餘年官民相安從無一征漕滋事之案蓋瘡痍  
未復公之所以培養之者深也五年調撫陝西出壽州士民  
送者相望於道時任柱賴汶洸兩股已被創自豫而東獨總  
愚擁悍黨乘間西趨賊氛橫亘於華渭河陝之間公輕車由

蒲渡河取道同朝知陝軍素疲定策入境後卽率師渡渭營  
渭南以守爲戰師未至賊已越渭南長驅而入公甫抵同州  
亟由間道入省嚴備以待無何陝軍潰於灞橋賊直薄省垣  
隴回爲捻所邀亦踵至城中無一可恃之兵人情洶洶公激  
厲疲卒登陴固守招集散亡以圖復振奏調劉松山郭寶昌  
兩軍入秦連敗賊於咸陽岐山富平朝邑捻不得休息與回  
再合一年之中捻未能挾回以窺河東繫公之力又以西同  
鳳所轄地勢平行力申堅壁清野之議令大小鄉均築堡以  
守厥後湘陰相國統師廓清隴右公實有預爲之謀者體本

羸弱頻年籌兵籌餉心力交瘁七年春移疾得請僑居秦州  
閉門著述繼配劉夫人工書畫雅有唱隨之樂八年劉夫人  
下世公子然一身惟思報國九年北上復拜倉場總督之  
命十年遷東河總督公統籌全局周厯履勘議築隄束水順  
黃北趨入海爲一勞永逸計惜不果行盛暑嚴寒宣防河次  
因復積勞成疾十三年十二月聞

穆宗毅皇帝升遐呼號欲絕光緒初元正月奉頒

遺詔勉率僚屬哭臨成禮釋服之期嗚咽不勝禮畢昏眩不  
起掖之入內遂卧牀絕粒以二月十四日薨享年六十有一

嗚呼公殆歸作

先皇侍從之臣耶遺疏上

聞

九重震悼贈太子少保銜公無嗣繼本生胞弟廷榘子聯寶  
爲後廷榘官江西鹽法道聯寶甫九齡應得二品廕生

恩賞主事公天性儉約不喜西人諸器公餘手不釋卷其已  
刊者爲塵蘿亭札記未梓者緯麈數十卷暨詩古文辭藏於  
家接見僚屬雖炎暑必衣冠危坐不揮筆何東洲太史贈句  
云裘帶溫文羊叔子衣冠樸野衛文公蓋紀實也在軍治軍

書一目數十行夜分始寢暇與賓僚討論往事講求利弊孳孳不倦其御將佐則解衣推食如家人父子而處變決疑當機立斷雷霆迅發莫可端倪待親故贈遺不少吝而不可干以私恢宏好結納而不周旋當路清風亮節卓然可傳於世公薨之後皖紳請於臨淮壽州各建專祠大府入告

從之昨又聞常州紳士請入祀名宦祠公之遺愛在民信而有徵非予一人之私言也某年某月某日葬某銘曰

我初交公公則了不異人公之出而典郡兮乃遭際夫邇迤既福三吳兮又福吾皖建牙樹纛兮經綸大展公爲名臣

兮公爲通儒公不驕人兮中抑抑而外愉愉公所造就兮皆  
美材狀公生平兮簡而該何以報公兮曰報公以文字濡禿  
管兮揮老淚迢迢佳城阻南北兮我思執紼嗟未得兮如公  
有幾人三朝宣力兮千秋不朽俾貞珉之是勒兮

通政使司通政使朱公墓誌銘

并序

光緒初元朱太史琛典試廣東歸道揚州持其尊甫景唐通  
政之狀乞予爲文誌墓予與通政爲齊年友曩在京師同館  
同臺相聚十餘稔朝夕過從形迹罔間及予轉外臺而公則  
由侍御內擢數年之中掌銀臺權憲部駸駸將大用顧以乞

假葬親歸里一病不起既忠且孝在公固可無憾而太史復能玉堂接武爲國掄才兢兢焉思表揚先人之德嗚呼予與公春明一別遂成永訣今幸公有子焚黃告祭足慰九泉予亦奚敢以不文辭按狀公諱夢元字貞起號錦堂又號景唐先世系出婺源緯公卽紫陽文公之伯曾祖宋建炎間始遷涇縣高祖萃廩貢生六合縣教諭曾祖安謙妣氏胡祖平洋妣氏洪考一崑妣氏洪世有隱德三代以公貴皆贈資政大夫妣皆贈夫人公以嘉慶壬申四月十一日生幼岐嶷穎敏過人讀書目數行下少長習帖括下筆卽工兼擅詞章之學

時贈公服賈章門人以族人有占籍貴溪者命公往應試補  
弟子員旋食餼道光丁酉科選拔貢生益下帷攻苦肄業豫  
章書院試輒冠其曹癸卯甲辰聯捷成進士改庶吉士尋丁  
母憂星奔回里越明年又丁父憂迭遭大故痛不欲生丙午  
奉兩輓歸厝於涇服除入都補行散館以部屬用籤分刑部  
充

上諭館行走癸丑

記名軍機章京甲寅補江西司主事秋審處行走勤於讀律  
援引必當治獄多所平反嘗曰桁楊之下必有冤囚能得其



情固不專恃威懼也乙卯擢福建司員外郎會荊州將軍綿  
洵公奏調赴湖北軍營襄理文案時方炎暑橐筆從戎勤勞  
備至未幾將軍去官公仍回京供職丁巳

記名御史戊午補軍機章京兼方略館編修直軍書旁午昕  
夕不遑撰擬悉當

上意遷山西司郎中己未補浙江道監察御史稽察北新倉  
復奉

命巡視西城人避驄馬莫敢干以私辛酉充武會試監試官  
是冬補行京察列一等同治初元壬戌引

見奉

古記名以道府用尋充覆試各省舉人監試官查勘貢院工  
程監察大挑舉人稽察本裕倉磨勘鄉試試卷擢鴻臚寺少  
卿先是公配葉夫人有婦德事舅姑克盡孝養公應禮部試  
時姑有疾夫人躬自調劑藥餌衣不解帶者幾兩月治家嚴  
肅勤而且儉公故無內顧憂隨宦都門嘗衣一敝裘補綴鱗  
次見者不知爲命婦也公未第時贈公年逾六旬抱孫念切  
夫人體舅心爲公納遣室王孺人生子三琛琇琪琛同治庚  
午辛未聯捷進士官翰林院編修女一孺人婉順能得堂上

歡佐夫人持門戶舉動必循禮法而夫人亦視子女如己出門內雍睦無間言乃於是冬先後下世公傷悼彌甚以父代母口不言劬戚郇謂公趨朝待漏不可以無內助有作詩寓勸者公答之曰不願爲兒添後母且將家政一身肩太史爲予述之猶淚潄潄下也公自壬戌十二月擢通政司參議癸亥二月又擢太常寺少卿十月轉大理寺少卿迨甲子四月擢太常寺卿五月復擢通政使司通政使曾未三稔頭銜五晉公念

兩朝知遇之恩益感激奮勉以圖報稱又奉

命稽察右翼宗學揀選貴州府縣等官典試山左得人爲盛  
試畢回京卽拜署理刑部右侍郎之

命公以往者久列綱曹趨堂畫諾今一旦秉丹筆位諸司上  
處事詳慎愈不敢自逸

朝廷知公明允真除當在指顧間而公則以故鄉寇擾窀窆  
未安弗忍貪戀榮祿因於丙寅春乞假修墓聞

命卽行兵燹之後疹氣積而不散遠歸者觸之輒病公抵里  
後見田園荒落故舊凋零展拜先塋益增悽愴遂染疫纏綿  
捐館舍是爲九月十九日享年五十有五公天性孝友律己

至嚴待人則和而介有以非義干者正色却之歷官清要忠誠亮節流露於奏草中立言務持大體爲國家培養元氣穆宗御極之初卽疏請豁免各直省歷年積欠錢糧得

旨俞允下部議行他如郵衛兵清庶獄請飭江西撫臣查辦殉難士庶奏加旌卹江西省城建立張文毅公專祠兼請予諡皆爲政體之大者不妄參劾亦不輕薦舉苟其人貽誤大局則糾彈不避苟其人克膺重寄則推薦必先至於杜漸防微內而宮禁外而疆場敷陳密勿留中不發者公輒焚其草外人固無由知之也嘗夢贈公訓之曰持以靜默鎮以從容

公醒而肅然銘諸座右自奉甚約食不兼味衣敝弗棄少時  
客漢臬爲人書誌銘受其酬或勸其置珍裘公曰吾將持歸  
奉甘旨遲以自炫耶嗜書不喜游覽公餘則手一編詞賦雍  
容華貴爲儕輩所推服撰擬進奉文字及唱和贈答詩篇不  
自收檢每爲友人攜去好揚人善後進有片長必獎之孤寒  
之士則加意培植之俾其成就而後已太史所狀若此嗚呼  
公方正之度肫摯之懷予習見之且心欽之誠如太史言是  
可傳也以某年某月日葬涇之某原銘曰

翺翺蹇蹇未竟厥施貽之後人俾守鈇規初見長公決其必

遇果然言中足傲姑布故里弗忘張香都從親地下身甯孤  
佳城峩峩蔭三株畢生行誼殊卓絕永播清芬延世澤謂予  
不信視此碣